

Powšitkowne WOZJEWJENJA

njedźelu, 21. meje 2017

Wulět samostejacych

Samostejacy ze serbskich wosadow změja srjedu, 31. meje, swój lětuši zhromadny wulět z busom, kotryž powjedže do Kamjenicy a Rudnych hór. Zajimcy njech so hač do póndžele, 22. meje, w redakciji Katolskeho Posoła přizjewja, telefonowe čisło (0 35 91) 55 02 12. Časy wotjězda busa z jednotliwych wsow so njedźelu do wulěta w Posole wozjewja.

Nalětni koncert w klósterskej zahrodže

Wšitkich zajimcow zbliska a zдалoka přeprašuje chór Lipa zhromadnje z Křescansko-socialnym kubłanskim skutkom na nalětni koncert, kotryž budže njedźelu, 21. meje, w 15.30 hodž. na zahrodže Zežiwjenskeho a zeloweho centruma w klóštrje Marijinej hwězdze w Pančicach-Kukowje. Pisany program k 110. róčnicy chóra wuhotuja spěwarki a spěwarjo z Lipjanskej džěčinu a dujerskej kapału Horjany. Wot 15.00 hodž. poskića kofej a tykanc.

Tutu njedźelu darmotnje do Serbskeho muzeja

Serbski superintendent Jan Malink wjedže tutu njedźelu, 21. meje, wot 15 hodž. po wosebitej wustajeńcy „Pječ lětstotkow. Serbja a reformacija“ w Budyskim Serbskim muzeju. Zarjadowanje we wobłuku 40. mjezynarodneho dnja muzejow je darmotne. Serbski muzej wšitkich zajimcow wutrobnje přeprašuje, tutu jónkrótnu składnosć wužić. Zdobom skedźbnja na to, zo su najdrohotniše pomniki serbskeho pismowstwa – Jakubicowy přełožk Noweho zakonja 1548 a přenjeji čišćanej knize z lět 1574 a 1597 z konserwatoriskich přičin jenož hišće hač do 25. junija wustajene. Wustajeńca sama pak traje hač do njedžele, 27. awgusta.

Z papu so zahorić dać

Nanojo ze swojimi džěćimi – wot předšulskeje staroby – su wot pjatka do njedžele, 9. do 11. junija, do Smochčanskeho Domu biskopa Bena přeprašeni. We wšelakich akcijach, hrach a rozmołwnych kołach chcedža so wěnować prašenju, što to woznamjenja, hdyž za něšto pališ, so horiš, hdyž sy zahorjeny a hdyž so jedyn druhého z něčim zahori. Tež wopyt Budyskeje wohnjoweje wobory je zaplanowany. Zajimcy njech so pod telefonowym čislom (03 59 35) 2 23 17 w Smochčicach přizjewja.

Kolesujo putnikować

K putniskemu tydzenjej na kole přeprašuje Smochčanski Dom biskopa Bena wot 13. do 20. awgusta. Čary powjedu po holi a hatach, po serbskich wsach, hornjołužiskich horach, podłu Łobja a Nysy. Zajimcy měli so w Smochčicach pod telefonowym čislom (03 59 35) 2 23 15 přizjewić.

W lětnich prózdninach do Sakskeje Šwicy

Dekanatne dušepastyrstwo přeprašuje šulerki a šulerjow wot 6. do 8. lětnika wot 17. do 20. julija na zhromadne dny w Rosenthalu-Bielatalu. Nadrobniše informacije nańdžeće na wupowěsnjenych plakatach w serbskich wosadach kaž tež pod www.posol.de.